



太史詩





文太史詩叙

南克王廷



甫田詩者衡山先生之所作也先生
少負不羣之才以經濟自任願屢試
不第將畢志於隱廼以

朝臣之薦授翰林待詔然非其好也
故身遊巖廊而心存泉石感時觸物
每有歸與之興居少日竟挂冠歸今
倘徉林壑且二十年嗚呼其真脫屣
於名利之場也哉讀陶潛傳至歸去

來辭未嘗不灑然欽其為人以為迥
絕塵俗無與為侶以今觀於先生其
出處大致畧無少異而高潔之操介
特之行夷曠之懷深遠之識有不可
以古今論者豈真戀情於一丘一壑

間哉先生著述甚富余嘗入先生之
室獲睹此編持歸讀之不能釋手因
錄而傳之詎惟見先生之好古博雅
亦庶幾少裨于名教云爾

嘉靖歲癸卯十一月幾望

自叙

余少喜作詩日有課歲有編十年成
數巨帙今日視之穉語耳雖然日力
可驗也汰其已甚得百篇第而錄之
或從考其志焉題曰甫田蓋取勞而

無功之義也

戊午歲除日衡山居士書

文太史詩

翰林院待詔兼修

國史文徵明

徵仲

五言古詩

飲子畏小樓

今日解馳逐投閒傍高廬君家在臯橋諠闐井市區
何以掩市聲充樓古今書左陳四五冊右傾三兩壺
我飲良有限伴子聊相娛與子故深密奔忙坐濶踈
旬月一會面同意勤情有餘蒼煙薄城首振袖復躊躇

○寂夜一首 效子建

中宵聞零雨撫枕起躊躇昏缸栖素壁流熠照重幃
感此寂無語戚然興我思我思何鬱伊欲舉焚如絲
少壯不待老功名須及時男兒不仗劍亦須建雲旗

三十尚隨人。奚以操筆爲文章。可腴道。曾不療寒饑。
仰屋媿塵浮。俯睇影依依。人生良有命。何獨令心悲。
心悲髮爲白。失脚令身危。欲爲絕世行。道遠恐不支。
世情忌檢飭。歛目俟其疲。誰能七尺身。受此千變機。
役役亦徒爾。多憂得無癡。惟應慎厥躬。古人以爲期。
題畫

瑤溪涵素秋。夜雨洗郊陌。漁梁不通市。悠然屏塵跡。
道人燕坐中。平坡淨於席。踈樹不遮山。斜陽亂寒碧。
爲陳子復畫扇戲題

長松蔭高原。虛亭寫清泚。重重夕陽山。忽墮清談裏。
吾生溪壑心。苦受塵氛累。時從筆墨間。塗抹聊爾耳。
亦知不療饑。性僻殊事此。有如魚吹沫。不自知所以。

世人不相諒。調笑呼畫史。紛然各有須。縑素盈案几。
鞿材真足厭。研吮良自恥。經旬一執筆。累歲不盈紙。
交遊怪逋慢。往往遭怒訾。豈知書生爲。未可俗工擬。
五日畫一石。十日畫一水。雖無王宰能。此例自可倚。
陳君乃何人。亦自顧庸鄙。一扇五更年。此負真緩矣。
吾方懼獲怒。君顧得之喜。一笑題謝君。賢於二三子。
秋日將至金陵舟泊慧山同諸友汲泉煮茗喜
而有作

少時閱茶經。水品謂能記。如何百里間。慧泉曾未試。
空餘裹茗興。十載勞夢寐。秋風吹扁舟。曉及山前寺。
始尋琴筑聲。旋見珠顆泌。龍唇雪漬薄。月沼玉渟泗。
乳腹信坡言。圓方亦隨地。不論味如何。清徹亦云異。

方大史詩
俯窺鑑須眉下掬走童稚高情殊未已紛然各攜器
昔聞李衛公千里曾驛致好奇雖自篤那可辨真偽
吾來良已晚手致不煩使袖中有先春活火還手爇
吾生不飲酒亦自得茗醉雖非古易牙其理可尋譬
向來所曾嘗扁阜出其次行當酌中冷一驗逋翁智
九月念八日夜夢中作

碧桐已蕭蕭冰谷流泱泱獨行蒼莽間犬吠人跡絕
旭日穿樹林青煙忽消滅時看殿巖風吹落松上雪

除夕有感

姍姍小兒語耿耿燈燭明空齋薄羞設言餞歲將行
人行有歸期歲行無復程誰云無復程行與來歲迎
不嫌去日遠端愁來歲併歲亦何去來送迎自人情

人生良有限七十二云已盈後此未可知今已半踐更
詩書苦無驗冉冉白髮生富貴非不樂功業亦所榮
少壯不相待老大徒心驚安得柔脆軀與此浮世爭
聖賢豈常在古人崇今名感歎寧有益濁酒還自傾

新正三日西齋對酒示陳淳乙丑

西齋掩晴晝有客過我遊攬衣起速客一笑散清愁
新聲麗屋角碧草被高丘涉春始三辰已覺氣變柔
行看換朱白清陰覆墻頭青春來何易白日去何遑
願言惜白日努力繼前修芳樽浮濁醪短案登嘉羞
客情方眷眷我意亦綢繆綢繆何所爲薄言氣相投
顧茲一日長屈置門生儔淺薄晚無聞笑以應子求
三年守殘經一舉不能謀豈曰屬時命要是業未優

業至名自成德淵心日休勳猷貴乘時少壯靡遲留
德荒學不講吾與子同憂

題畫贈許國用

窮巷十日雨泥深斷來客西齋午夢破寔然識高屐
啓戶延故人一笑慰乖隔閒牕設香茗短榻散書冊
涉筆寫滄洲居然見泉石春山正沈沈春雨猶氤氳
密竹曉低迷弱雲晚狼籍挾蓋緣高岡貌子獨行迹
子迹良已竒吾意無乃劇吾生雅事此亦頗自珍惜
願爲識者畫不受俗子迫惟君鑒賞家心嗜口不索
吾終不君靳不索翻自獲君能用君法吾自適吾適
當得吾意時知否初未擇偶落好事手謬謂能入格
餘人惟和聲遂使虛名赫雖得知已憐頗爲遺者責

誰云興致高正坐能事厄幾欲謝膠鉛就中有深癖
我癖君更甚收此顧何益君言有妙理意自不能釋
我畫惜如金君藏慎於壁好畫與好藏同是爲物役

聽竹

虛齋坐深寂涼聲送清美雜佩搖天風孤琴瀉流水
尋聲自何來蒼竿在庭圯泠然如有應聲耳相諾唯
竹聲良已佳吾耳亦清矣誰云聽在竹要識聽由已
人清比脩竹竹瘦比君子聲入心自通一物聊彼此
傍人漫求聲已在無聲裏不然吾自吾竹亦自竹爾
雖日與竹居終然邈千里請看太始音豈入箏琶耳

陳氏池亭納涼

朱雲爨天漢金烏朗炎曦方夏苦埃鬱言遵芳園嬉

息鞅俛南樹，褰裳蔭北池。微涼度鮮飈，淺碧漾寒漪。
短藻翻鱗鬣，閒渚集鳧鷖。流日落翔泳，遊心寓篇詞。
願言領幽意，況復酬心知。坐撫景光寂，還憐車馬稀。
逍遙極瞻諷，旦晝不知疲。疇能均涼燠，無爲居所移。
小齋盆蘭一幹數，花山谷所謂蕙也。初秋忽抽
數幹，芬馥可愛。因與次明道復賞而賦之。

時雨祛殘暑，涼颺集華軒。春徂衆芳歇，晚蕙抽璫根。
重茲蘭之屬，不與凡卉羣。離離水蒼佩，肅肅紫霞紳。
耿耿孤榻畔，燕對如高人。啓扉得良友，列案羅清樽。
於焉撫靈植，一笑滌塵煩。微風南牖來，濃馥散氤氳。
有時參鼻觀，卽之已無存。譬彼孤潔士，可望不可親。
如何庭階近，有此幽谷芬。相忘餘冽中，漸久不復聞。

魯哲日已遠，楚纍亦沈淪。無能被雅搯，且復酌芳魂。
感興一首

婉婉歲年謝，霜雪淒以繁。崇寒集枯條，朝華不復存。
幽人眷遲暮，靜息藏晏溫。春風日夕至，吹綠墻下根。
氣機無代謝，焉知松檜尊。

歲暮雪晴山齋肆目，偶閱謝臯羽詩，窮冬疑有
雨，一雪却成晴，喜其精妙，因衍爲韻賦小詩十
章

歲晏羣芳息，枯條鳴北風。層陰結黯靄，朔雪飛長空。
玄冥肅景象，物化歸終窮。妍華肇伊始，冉冉收春功。

其二

積雪縞晴晝，離離見高松。睠茲歲寒枝，不復知春冬。

旭光時明滅奄忽浮雲蹤塵心不能戢歲晏徒忡忡
其三

朝光射晴綺飛翼炫瑤姿微風吹竹藂文玉紛差差
霜草行已斃冰谷流寒澌玄機抱終始逝矣夫何疑

其四

夜寒拂衾稠曉色明牕牖有客從叩門稚子方擁帚
玉梅已敷英寒香在纖手一樽疇與同自入無何有

其五

空庭集饑鳥景色入寒沍濃陰釀朔雪松石積縞素
玉顏不堅好日出四簷雨薄晚北風微幽人啓朱戶

其六

朔吹號枯藤日暮殊未息居人事塞向鷺鳥厲高翼

不知夜來雪庭戶皓已積來麥端可期三白已兆一
其七

陽卉不復腓研沼冰初結雲日弄寒姿晶光互明滅
雙扉風自揜陋巷人跡絕庭鳥忽自飛蒼松落殘雪

其八

初旭射茆簷枯藂戀寒雀睡起無餘聲風簾時自約
展冊娛道言樽酒獨斟酌無人不妨閒客至亦不却

其九

擁寒不出戶焚香娛燕清朝日照盃盞浮光上虛楹
修竹不受風時時蒼玉鳴閒情溢眉宇酒醒詩亦成

其十

殘雪不蔽瓦斷溜收寒聲晨威淒以嚴雲日麗新晴

振藜薄枯卉不復榮年光屬歸歛慘淡有餘清
春興二首

春陽轉芳序淑景麗清嘉晨風扇微和百鳥鳴周遮
繁陰泫清露朱英耀朝華端居媿物化起擷崇蘭葩
貞芬媚幽獨常恐委泥沙青青陌上草日夕遍天涯

其二

妍英弄芳意柳色含春姿物華浩無涘駘蕩東風吹
東風日以熙草色日以滋青春萬里道遊子有所思
浮雲漏白日宿露朝已晞攀條惜婉麗忽得瑛瓊枝
芳悰未有托暮景已西馳菁華難復恃結皓聊自怡

支峒山

平巒疊蒼翠云是支峒山支公今何在白日空嶢顏

灌莽翳深壑有泉覆其間委流界中道足底聞潺湲
悠悠遺世人曾此寄高閒芳蹤藐難屬古字蝕苔斑
題畫贈皇甫太守

斜陽帶迴堰秋影落寒潭微風薄高樹巖花落粼粼
何以消宴坐溪聲答高談虛闌寫空馥踈簾搖夕嵐
君今有公事萬里策征驂還應燕寢地展卷憶江南
古風贈鄭先生

紫蘭生谷中英英茁瓊芽芳根抱幽獨不知桃李花
桃李當春時明麗烘朝霞物化歸有盡穠艷無常華
風雨日夕至零落空泥沙回看幽谷藂奕葉含芬葩
旁滋百畝蕙畱夷均揭車申椒雜薜芷百馥紛交加
終資扈紉收豈久在天涯胡猶困蕢棗日暮令人嗟

被服平生懷欲往道匪遐願言從明潔卒歲保貞嘉

二月

二月春尚早青泥沒蘭芽東風日夜急吹雨作瑤花
玉龍壓層簷素月流寒沙香紅逐飛鞚令人憶東華

題畫

高礪落寒泉窮巖帶疎樹山深無車馬獨有幽人度
幽人何所從白雲最深處出山不知遙願見雲間路

三月既望同吳次明蔡九達陳道復湯子重王
履約履仁汎舟石湖遂登治平以天朗氣清惠

風和暢為韻分得朗字

良期每多違佳節悵虛往薄言城西遊餘春遲幽賞
日色漾漣漪天光發融朗清吹飄文裾瑤湍激蘭漿

寄懷涉清川平目眺遐壤晴霏動遙岑青煙散脩莽
亞竹孤卉明隔木春禽響及此單袂成聊寄臨流想

先友詩并序

徵明生晚且賤弗獲承事海內先達然以先君之
故竊嘗接識一二比來相次淪謝追思興慨各賦
一詩命曰先友不敢自托於諸公也

太僕李公應禎

太僕在三舍抗言拒刑臣公在太學中官牛玉欲平
延教子公正言拒之

生強執志已究未達身十年更外制耿挺標清真矯
矯孤飛鴻翹翹一角麟卿監晚回翔白髮已盈巾故
國有佳山長岐多風塵終然絕俗姿逸去疇能馴

叅政陸公容

陸公婁東鳳少小已翱翔

公少與張滄洲泰陸靜逸
銖齊名時稱婁東三鳳

耿耿文莊公識公在班行職方振風采抗疏拒羣璫
章程在司馬至今有耿光名隆毀斯來讒構伺其傍
叅藩亦晚達竟爲讐者傷清風不終泯遺書滿緹緗

定山莊公景

定山古通儒學道希聖賢古義與時違歛息賁園田
黃花媚幽徑白鳥泳清川悠悠青山適一往三十年
高羅弗爲求欲致無由緣非無濟世心亦有清廟篇
惜哉用違材零落成棄捐

文定吳公寬

有偉延陵公居然古明德道義周一身文章可華國
悠悠明堂思允矣清廟瑟惜哉晚登庸位用時未極

還能敦薄夫坐亦消纔慝德淵物爲遷曾誰覩聲色
聖賢不復生斯人重吾憶

禮侍謝公鐸

巖巖天台山下有幽貞士咀英擷芳鮮燁然散霞綺
早歲登延閣回翔石渠裡壁雍育羣材金匱抽青史
雖復恩眷殊不爲纓組累方巖有書堂歸來還秉耒
屢召不終淹誰應會深旨

處士沈公周

東南有一士蘭帶芙蓉裳璚珠雜瑤玦皎然明月光
不隨鳴鳳下甘與黃鵠翔秋風自廖廓羅網漫高張
采芳涉秋苑看雲撫層岡不爲平生得白首聊倘佯
悠悠天隨子千載永相望

叅議王公微

王公夫如何侃侃古遺直一命青瑣闈慷慨思效職
此身朝闕廷暮已在絕域所期言職伸寧計一身抑
丘樊樂優游 天子思舊德陝郊甫甸宣邁歸一何
亟松菊媚幽人鍾山有佳色

太常呂公愆

太常名家子英英蒼玉珎文章足華煥秉志亦堅完
禮曹肅供奉弱冠已騫搏不愛蔭補郎自致青雲端
滁山詠列錦銀臺達糾彈所至必宣秉云胡不終安
只應千首詩終古無能刊

宿任城次九達韻

北風吹古堰長河捲沙白昔聞謫仙人曾作任城客

任城非故樓勝事今尚籍想見天人姿春風岸鳥嘖
落月伴長庚何處尋醉魄我行後千年空見徂徠碧
長笛起鄰舟夜靜聲裂石不見賀知章悲歌向中夕

鉅野次九達韻

黃河互迴折青山時隱見行行次鉅野古服猶漢縣
空聞澤旣豬非復禹初甸野色浩無垠忽復春風變
春風不可稽客子行亦倦黃金日以銷轉覺青衫賤
雨濁或膠舟時行眺迴堰驚吹捲平沙河流激飛箭
何處望神京天涯雲一片誰云千里遙去去南風便

無錫道中遇雪夜泊望亭二首

北風吹朔雪飛霰雜零雨孤舟暮不前收帆得沙渚
天垂野陰合日溟江雲吐川原入蕭條林木積縞素

寒厖噤不鳴，饑鳥驚還聚。舉酒不成權，挑燈時自語。
飄泊豈在遠，出門卽羈旅。

其二

長林風怒號，天低浦雲黑。空村煙火微，近渚漁舟集。
路暗行迹稀，蒼然見寒色。野泊不成眠，羈魂還惻惻。
昏燈黯欲絕，歸夢迷咫尺。戍遠更漏沉，川寒聲影息。
不知積雪深，夜久孤蓬仄。

九日遊雙塔院次淵明己酉九日韻

時叙不容淹，忽忽寒暑交。矧余蒲柳姿，望秋已先凋。
山林樂閒曠，勢途利崇高。人性各有適，奚但壤與霄。
爰以一日歡，酬此卒歲勞。古來明哲士，取材不遺焦。
銜觴輒忘世，何似栗丘陶。得酒且復樂，安能待來朝。

十日遊治平寺再疊前韻

季秋氣未肅，鳴禽尚交交。澄空霜華薄，木葉不盡彫。
撫輿陟前岡，不覺身已高。回視平湖東，逸峯聳晴霄。
但欣雙目明，寧辭一身勞。物理會有窮，何以心煩焦。
世情共擾擾，吾樂方陶陶。達人悟遷化，千載猶一朝。
新晴

五星硯并序

余得古端硯，銳首豐下形，如覆盆，面鏤五星，聚奎
及蓬萊三島，左右蟠雙螭，刻其背，令虛鐫東坡製
銘一龜，橫出作屬屬狀，文鏤精緻，不知何時物也。

因命爲五星硯

買市得古硯雅與時製別銳首下微豐剗中面多纈
盤盤覆雕盆斬斬截古鐵背銘龜巧負周飾螭雙揭
層閣擬蓬居羣星象奎列聚觀驚特竒細翫有餘拙
製豈由常徒材仍出下穴挹毫真有助受水復不竭
何爲塵市中簿算幾沒滅爰登文字場永厲清重節
確磨應不辭汗辱庶幾雪吾儕二三子無日不相接
管城與玄楮固自有優劣得君稠人中應是諸子傑
幽牕榻無時小圃吟不輟從今難復離坐置行復挈
良充几格翫何但揮灑設便須襲錦囊勿與儔類褻

人日王氏東園小集

晴颺汎叢條浮陽散修莽良時及初正涉七氣已爽
厥日肇惟人探占喜融朗駕言求友生名園欣獨往
折蔬充朱豈扶藜企高壤陟彼墻下岡寄此天際想
被草晨風和隔竹春禽響

新秋夜坐

斜光暗層樓庭陰乍分暝間門夕未掩月出虛廡靜
明滅腐草暉參差碧梧影秋至涼風生蛩鳴夜初永
撫景慨多違驚時每深省白髮不待年況此百憂并
沈沈市喧息稍稍栖禽定不知更漏深坐覺衣裳冷
仰睇北斗橫繁星麗光炯牛女寂不言銀河空耿耿
不寐

欹枕數寒更漫漫不能旦天寒雞再號燈昏鼠窺案
藥鑪火已微羣兒睡方鼾清風自何來冷然動虛幔

病眼苦不眠，循牀發遐歎。人世百年短，吾生已強半。
况此貧賤軀，時爲小兒翫。一臥五經旬，形消髮垂燦。
神情日以摧，志業交凌亂。豈不懷明時，流光榻中換。
平生二三友，雅志在霄漢。下壽曾不滿，半逐浮雲散。
感此念微明，悠悠何足羨。明月度孤音，霜華滿庭院。
題畫二首

稍稍涼思集，依依炎景流。西風吹木葉，秋色滿蘋洲。
伊人何所懷，掇棹自夷猶。青山在蓬底，白雲宿船頭。
滄波渺然去，仰見天漢浮。飛塵暗岐路，回首正悠悠。
其二

輕浪激迴渚，光風汎榮條。青天渺何許，中流見仙橈。
修眉落明鏡，蘭帶香雲飄。含情采芙蓉，無那美人遙。

文太史詩

文太史詩

翰林院待詔兼修 國史文徵明 徵仲

七言古詩

題友婿王世寶鈞勒竹

湘竿淚歇斑不畱縞衣玉立清而虬蕭蕭寒月照空
影冉冉白雲生素秋誰家美人誇雪面中庭搖佩清
霜愁飛來白鳳何所有玉宇瑟瑟風颼颼古來畫竹
誰最優先宋彭城元薊丘誰翻新格作鈞勒王君一
派真其儔稍從筆底超變相遂能意外資窮搜應以
虛心本性在不使粉節緇塵浮清陰雖改風骨是意
足宜於形色求竒踪豈出漢飛白古意尚有唐雙鈞
昔人論書謂心畫看君畫筆知清修我方有愧文與

可君已真如王子猷高堂對此心悠悠聊書數語遙
相投殷勤報我無多謀雙竹不讓雙瑠球

余畫金焦落照圖吳水部德徵先生寄示二詩

題謝長句

憶昨浮船下揚子平翻渺渺波千里何來雙鳥挾飛
樓璀璨彤煌截濤起夕峰倒墮滿江陰霜樹高浮半
空紫舟人指點落日處凌亂煙光射金綺平生快覩
無此竒却恨歸帆北風駛至今偉蹟在胷中回首登
臨心不已偶然興落尺紙間便欲平吞大江水固知
心手不相能塗抹聊當臥遊爾晴牕舒卷日數回不
敢示人聊自喜水部先生詩有名忽枉瑤篇重稱美
漫云家法自湖州自媿區區何足齒由來題品係名

聲何況先生是詩史君不見當年畫馬曹將軍附名
甫集猶不死又不見閻公自謂起文雋池上俄蒙畫
師耻人生固有幸不幸拙劣何堪古人儼江山千載
等陳迹一笑寧須論非是

新荔篇

常熟顧氏自閩中移荔枝數本經歲遂活石田使
折枝驗之翠葉芄芄然不敢信也以示閩人良是
因作新荔篇命壁同賦

錦苞紫膜白雪膚海南生荔天下無鹽蒸蜜漬失真
性平生所見唯萎枯相傳尤物不離土畏冷那得來
三吳顧家傳來三數株桂身翠幄森森殊遠人無憑
未敢信持問閩士咸驚呼還聞纍然生數子絳綃裡

玉分明是未論香色果如何只說形模已珍美千載
空流北客涎一朝忽落饒夫齒白圖蔡譜漫誇張文
飾寧如親目視飽啗只於鄉里足鮮嘗漸去京師邇
不須更作嶺南人只恐又無天下痛朝來自訝還自
疑事出非常有如此雖云遠附商船達不謂滋培遂
生活始知生物無近遠故應好事能回幹卉物聊占
地氣遷造化竟爲人事奪仙人本是海山姿從此江
鄉亦萌蘖由來沃衍說吾鄉異品珍嘗曾不乏不緣
此物便增重無乃人心貴希潤福山楊梅洞庭柑佳
名久已擅東南風情氣味不相下稱絕今兼荔子三
次韻題子畏所畫黃茆小景

斜日翻波山倒浸晚晴鈎出西南勝絕島雙螺樹色

浮遙天一線鷗飛剩誰剪吳淞尺紙間唐君曾有洞
庭山古藤危磴黃茆渚細草荒宮消夏灣我生無緣
空夢墮三十年來蟻旋磨睡起牕前展畫看恍然垂
手磯頭坐湖山宜雨亦宜晴春色籠葱秋月明知君
作畫不是畫分明詩境但無聲古稱詩畫無彼此以
口傳心還應指從君欲下一轉語何人會吸西江水

遊慧山

憶得新秋慧山路小艦歸來及秋暮東行不負酌泉
盟一笑再理登山屨山中草木漸衰歇依舊靈泉雪
流乳腸胃聊煎肉食腥鬚眉淨洗京塵污雅致仍攜
小筧茶舊遊愧讀南墻句墨痕凌亂猶昨日老衲衣
稀說前度三旬才到一何稽一月兩番無乃屢人情

嗜好信有偏至理自知非可諭我生自謂萬緣輕泉
石娛人却成痼那能過此但空歸縱不可留須一肩
小奚解事走相從餅罌預潔提泉具斜陽一抹滯奔
程好奇正得舟人怒回視舟人笑不言就中有理無
相苦

寄題瑞州清風亭亭爲夏太常仲昭守郡時作
黃應龍追記其事乞詩

瑞州山色照江青瑞州太守風冷冷時移事換太守
去清風自蔭山間亭山亭無塵石齒齒百歲風流人
仰止同鄉博士悵來遲撫景懷賢託文字寫心狀物
記當時我不識亭心已至清規寺左萬松長彷彿與
客登崇岡松聲激耳溪流駛月色灑面梧桐涼清風

濯人固自爽景物快意還相當須知物盡風有歇惟
有德在人難忘瑞人緣德護斯亭我復因亭見典刑
亭前千挺琅玕清亭中之人能寫生此君本無食肉
相老守况負清饒名祇今墨君滿天下清風何獨瑞
州城

題石田先生畫

細泉汨汨落澗平蒼煙不動沙洲橫湖亭欲上山滿
目新水浮空春雨晴江南此景誰貌得白石先生最
神逸輕風淡日摠詩情疎樹平臯俱畫筆由來畫品
屬詩人何況王維發興新曾中爛熳富丘壑信手塗
抹皆天真墨痕慘淡發古意筆力簡遠無纖塵古人
論畫貴氣骨先生老筆開嶙峋近來俗手工模擬一

圖朝出暮百紙先生不辨亦不嗔自謂適情聊復爾
豈知中有三昧在可以意傳非色取庸工惡札競投
集鳳凰一出山雞靡高堂拂曉見滄洲恍然置我重
巖裏定應奪却造化工不然剪取吳淞水神完意到
輕千年題作古人誰不然

題廬山圖

余爲林師寫丘壑高閒用謝幼輿事也而石田丈
以廬山高賦之輒亦賦此

壯哉廬山天下奇瀑流千丈江瀾瀾何人巨筆寫奇
秀歐公昔贈劉君詞蒐玄挾怪轢萬象萬古直與山
爭馳莆田先生山澤姿壯節五老同崔嵬名通仕版
偶服吏癖在泉石終難醫高堂東絹風披披令我掃

筆爲嶽崎飛橋細路緣翠壁偃松絕壑臨蒼坻已擬
先生謝幼輿故著逸士泉之湄就中有理未可說却
被石翁加品題惟翁自有王維筆謂我解畫歐公詩
由來絕唱不可和况此粉墨那容追祇應披霧見突
兀庶此峻拔如吾師吾師真是劉凝之我視六一無
能爲凝之不作六一遠此詩此畫誰當知

天池

碧雲十里山重重舉首忽見蓮花峰晴嵐霏空展蒼
壁午陰匝地搖長松遊人着脚萬松頂蜿蜒細路凌
飛筇不知去地幾千丈乃有寒瀨流琤琮微波吹魚
動石脚倒影落鏡浮雲容臨流弄玉搖明空水中照
見青芙蓉穹崖擘鐵迸雪乳定出天造非人庸下方

春來萬井渴安得此澤常溶溶我疑高源隱天漢或
是陰壑蟠虬龍又疑造物喜變幻顛倒景象潛其蹤
不然水濕本就下一泓上出夫何從嘗聞此山可度
難靈區信是千年鐘枕中秘記誰復悉異人有在何
當逢

題畫二首

東風吹春著幽谷宿雨浮煙樹新沐斜橋曲徑帶流
水白日踈籬陰濃綠晴江隔世不隔山百疊蒼螺墮
茆屋輪却長吟抱膝人鎮日臨磯弄晴淥

其二

千巖拔地排青蒼古松稷稷連重岡岡迴嶺複得竒
絕瀑流千丈垂銀潢盤盤細路入雲長兩崖對起懸

飛梁雲重路僻不知處應有仙家在深塢夕陽變滅
晚山寒無限風煙屬倚闌

醉仙圖

長松拔地生晝寒玉泉汨汨鳴高灘世間萬事日不
足山中百年才轉轂試看騎馬傍朱門何似養芝友
麕鹿有時高嘯度長風白雲扶醉蓬萊宿蓬萊之宮
渺何許中有儒仙自霞舉寧知城市有閒人只與仙
家隔一塵

爲吳心遠補石田未完小畫并次遺韻

石翁已賦白玉樓畫圖猶記荆溪遊殘縑未了人事
改百年生世真如浮補亡到我媿貂尾絕筆從前推
虎頭坐中見畫誰最愁吳翁昨日共經丘故人何處

山在眼歲月不待江空流東來無限西州感不妨十日爲遲留

題黃應龍所藏巨然廬山圖

筠陽文學倦官職十年歸來四壁立探囊大笑得片紙不啻瓊球加拾襲攜來示我俾品評謂是名僧巨然筆渙跡漓踪那辨真白閒雙印還堪識古篆依稀顛州字先宋流傳非一日要知源委出珍藏未論誰何定名跡墨渝紙敝神自存老筆嶙皴况超逸岡巒迤邐蒙密樹浦淑縈紆帶村室盤盤細路繞山椒斜引魚梁更東出途窮山盡得幽居穹宮傑構臨清渠仙邪佛邪定何處髣髴勝境如匡廬還從文學問何如大笑謂我言非虛自言遠遊真不俗曾見廬山真

面目五老之峰披白花晴獻萬丈時飛瀑某丘某壑皆舊遊展卷晴牕眼猶熟祇今老倦到無由對此時特作臥遊慙余裹足不出戶聞君此語心悠悠高懷只尺已千里眼中殊覺欠扁舟

早起

殘更斷續天蒼蒼開門汲井夜欲央雞聲人語杳無際落月曙色相爲光臨風短髮不受握泫露碧葉微生涼屋頭日出萬事集惜取靜境聊倘佯

蕉池積雪次張伯雨韻

空山白石漢甌洗不與時世俱凋零天星墮地更皎皎土花蝕雨何青青千年物色本同幻前輩畫格能遺形懷賢弔古意無極一笑醉倒雙銀瓶

謝錢孔周送蟹

窮陰欲雪天瀰瀰塞戶僵眠對書几故人知我有高
懷緘書爲致佳公子淞江水涸稻畦空掃簾竭澤那
求此吾生於此頗關情况對一尊清更旨老妻大笑
異尋常我自適情君勿止輪困犖确類高人對此若
醒真俗矣霜螯歷落久垂涎紫瀾淋漓先染指誅求
旣已極脂膏搜剔還應窮爪跪莫言支解本無罪正
坐尊前風味美淮陰慷慨以功烹傅奕風流緣酒死
一笑題詩謝故人坐上江山已千里

題虢國夫人夜遊圖

紫塵拂轡春融融參差飛鞚騎如龍錦韉繡帶簇妖
麗絳紗玳燭圍香風春風交花光屬路後騎雍容前

卻顧中間一騎來逡巡秀眉玉頰真天人翠微垂鬢
被襦身彷彿當年虢與秦佳人絕代真難得安得君
王不爲惑豈知尤物禍之階不獨傾城竟傾國一時
喪亂已足憐後世方誇好顏色晴牕展卷慢多情百
年青史自分明莫言畫史都無意尺素還堪鑒興廢

次韻題王山農墨梅

西湖老樹凌風霜敷英奕奕先羣芳貞姿不作兒女
態炯然冰玉生寒芒窮寒襲人膚欲裂幽人自詠孤
山雪至今秀句落人間暗香浮動黃昏月却恨無人
續高韻墨痕聊寄江南信不關素質暗緇塵剛愛鉛
煤點新髻慌疑寒影照昏釭刻畫無醞誰濫錫逃禪
已遠嗣者寡彷彿尚記山農王山農何處骨已冷展

卷令人雙目醒何因為喚玉妃魂極目晴波湖萬頃
臘月十八日冒雨過湯子重草堂適王履吉亦
在燕談竟日因賦長句奉贈二君

窮陰約雨風淒淒短靴犖确沾豐泥草堂舊路行不
迷依然碧鳳坊之西荒庭無聊野煙合暮雲欲壓寒
簷低平生故人忽在眼升階一笑欣相攜湯君秀潤
擬文犀王郎清才釘坐梨二君真是後來秀風儀濯
濯情依依文章奕煜煥星斗意度坦蕩和天倪祥麟
一角世所稀乃肯下友同山麝顧余骯髒何所有當
年豪氣騰虹霓世間萬事不比數欲起古人相與齊
區區薄劣不自知力小負重成顛擠空然虛譽動州
里漸久亦盡行如漸邇來推與愧諸彥大似野鶴容

山雞我真老大曳尾龜公等駭躍凌雲驥已窺正的
寧有失坐躡高峻何煩梯百年文運端有屬萬里脩
程方發蹄還聞問學貴忠信非德有受終無稽彌文
曼采祗自困如屋不棟車無輓深言贈君君勿疑由
來丹鳳無卑棲前賢風躡去未遠我不足道君當躋

蘭房曲戲贈王履吉效李賀

彤雲旖旎霏祥光蘭椒沃壁含璫芳流蘇嫋嫋開洞
房晚波繡燭搖鴛鴦鴛鴦雙飛情宛轉紫帶垂螭覺
螭緩綠膏照粉玉缸斜瑤鴨融春翠雲暖海綃落枕
夜何如美人笑擲雙明珠巫雲朝歛金釵溜不恨巫
雲恨花漏

春曉曲

翠塵沃日煙霏霏彤光飛上千杲愚誰家高樓鎖春色金鋪約戶蟠雙螭東風掠幌鸞綃動瑤島蘭溫睡初重起來臨鏡悄無言含情自理雙鶯夢夢回生怕守官殘捲袖移鞦獨自看燕子銜春欲飛去海棠猶自勒輕寒簾幙垂寒朝不捲綺疏結香春較淺欲裁羅段作春衫自熨薰爐熨金剪

春夜曲

璫雲貫月溶金波碧煙羃樹春婆娑海珠泣紅花露重蜃脂流絳闌透迤越羅複幙交流蘇繡襦結帶明青蛾金壺轉刻彤龍濕漏水濺濺轆轤澀轆轤沈沈軋銀井畫轂難淹夜愁永起看青漢不成眠不見雙星見河影河明月淡斗橫斜通宵春思匝天涯眉端

心事說不得自調新譜按琵琶

采蓮圖

橫塘西頭春水生荷花落日照人明花深葉暗不辨人有時葉底聞歌聲歌聲宛轉誰家女自把雙橈擊蘭渚不愁擊渚濺紅裳水中驚起雙鴛鴦

采桑圖

茜裙青袂誰家女結伴墻東采桑去採桑日暮怕歸遲室中箔寒蠶苦饑只愁墻下桑葉稀不知墻頭花亂飛一春辛苦只自知百年能着幾羅衣

題沈氏所藏石田臨小米大姚江圖

長洲沈氏舊藏小米真跡成化間有假中官之勢取之石田爲追摹此圖

春雲沈空山有無眼明見此姚江圖圖窮爛熳得題
字照人百顆驪龍珠平生雅識敷文書紹興歲月仍
不誣豈知尤物能媒禍繭紙蘭亭已非故石翁信事
學行人能使邳鄆還故步憶昔儉人賄爲囿黷財更
假狂闡手千里珍竒歸檢括故家舊物那容守沈氏
藏茲二百年一朝掣去心茫然誰言物聚必有散手
澤相關常累歎未能一笑付忘弓且喜百年還舊觀
豈余鈍眼錯顏標抵掌真成孫叔敖區區不獨形模
似更存風骨驪黃外一時點筆迥通神得非小米是
前身從來藝事關人品敢謂今人非古人

五月十三夜與子重履約履仁石湖行春橋看

月

夕光沈山蒼靄橫行春橋東江月生長風吹波天鏡
闊白波渺渺菰蒲聲微瀾壓玉搖空明扁舟忽動江
湖情魯頭魚蝦夜可買得酒試與諸君傾山空夜久
人竟醉高歌互答漁舟驚漁舟天上來棹入滄溟去
似聞漁歌縹緲不斷出煙蘿水遠天長不知處一髮
青山落鏡中萬里橫河碧空曙人生行樂不易得賞
心況有尊前客江山如畫酒如澠相看不飲空頭白
不見橋東千尺臺吳王曾此夜銜杯懽燕不堪芳漏
促西施舞罷越兵來越兵已成功越王安在哉鴟夷
竟去不復回吳宮越壘空復生蒼苔千古興亡總湮
滅只有湖山未消歇吳王去來今幾時幾人能醉湖
中月

題高房山橫軸

春雲離離浮紙膚翠攢百疊山模糊山空雲斷得流
水咫尺萬里開江湖依然灌莽帶茅屋亦復斷渚迷
菰蒲岡巒出沒互隱見明晦陰晴日千變平生未省
識匡廬玉削芙蓉正當面宛轉香鑪霏紫煙依稀夢
澤分秋練未遂扁舟夢裏遊酒醒獨展燈前卷問誰
能事奪天工前元畫史推高公已應氣槩吞北苑未
合曾次饒南宮南宮已矣北苑死百年惟有房山耳
祇今遺墨已無多牕前把卷重摩挲世間吮筆爭么
麼掃滅畦徑奈爾高公何

明妃曲

漢廷議和親佳人使絕域明妃隨例行祇謂掖庭職

一朝臨遣動天子始信深宮未曾識當日丹青亦等
閒今知不得黃金力正緣平日懷貞素非敢從前恃
顏色由來顏色不自知愛惜自是君王私君王顧妾
恩何厚竟按臣工戮延壽佳人自有命畫工何能爲
長信宮中長別離當時豈亦有人欺悠悠青塚胡沙
裏千載終爲漢家死紅顏命薄古云然不恨臣工况
天子

題漁隱圖四首

江南雨收春柳綠碧煙斂盡春江曲十里蒲芽斷渚
香千尺桃花春水足溪翁鎮日臨清渠坐弄長竿不
爲魚太平物色不到此安知不是嚴光徒

其二

江頭夏雨十尺強晚波搖日空江涼遊魚澆潯樂深
數不謂人間有漁筍網得江魚不稅官自食自漁終
歲歡輸租轉賦世途惡漁家自得江湖樂

其三

漁翁老去頭如雪短笠輕蓑舟一葉百頃魚蝦足歲
租十隻鷓鴣是家業橫笛朝衝柳外風浩歌夜弄波
心月不嫌湖上有風波世路風波今更多

其四

煙沈風緊鳴蕭蓼江湖歲晚玄冥肅寒塘日出曉光
浮村甕茅柴酒初熟網得水鱗不入城自灑瓦盆招
近局款乃一聲煙水長葦深江靜燃湘竹

和楊鐵厓石湖花遊曲

石湖雨歇山空濛美人却扇歌迴風歌聲宛轉菱花
裏鴛鴦飛來天拍水當時仙伯醉雲門酒痕翻汗石
榴裙遺踪無復芳塵步湖上空餘昔人墓昔人既去
今人來千載風流付一杯雪藕縈絲薦冰椀蛺蝶穿
花逐歌板夕陽剛去畫橋西一段春光屬品題傷心
不見催花使只有黃鸝啼再四無限春愁誰與箋玉
奴會唱紫霞篇

新燕篇

杏花飛飛春燕來主人花下新堂開花間相見驚相
識綠樹東風捲簾入漠漠踈煙碧草齊斑斑小雨春
泥濕城中甲第連雲起畫棟朱甍春旖旎故壘能無
繡幕思多情却向茅簷底茅簷日暖繡幙寒去來只

作尋常看乃知物性無新故世人自爾分貧富我家
舊宅經幾遷僅有此屋三年前一朝差池忽在眼便
覺華煥生棖椽不嫌香土污書帙時有飛花落舞筵
人言禽鳥得氣先主人貧病何當痊人生未怕常貧
賤但願年年見新燕

夜坐

幽人被酒夜不眠攬衣起坐垂堂前參差花影忽滿
地仰見明月流青天微風吹空星漠漠時有羈鴻度
寥廓美人不來更漏沉天南縹緲銀河落

題三城王畫桃花過墻枝

彤宮雨晴春婉婉妍華不隔深庭院試拈丹粉弄春
韶淡痕已破東風面醉肌暈碧曉生光脉脉閒情眉

歛黃不從畫史爭新格自有湛然宮樣粧世謂滕王
元嬰善畫

蛟蝶花鳥而董道獨以
為滕王湛然未知孰是

文太史詩

文太史詩

翰林院待詔兼修 國史文徵明 徵仲

五言律詩

春日閒詠

時節燒燈近 羈窮獨臥家
餘寒春挾纒 殘困晚煎茶
土潤先滋草 梅晴薄試花
新年眠食好 隨分足生涯
故園

屋舍小山村 終然思故園
雨晴秋倚閣 月出夜開門
好景亦無改 遠人空目存
梅花未消息 行矣晚何言

東葛城夜發

蕭蕭東葛路 馬上聽嚴更
月出高山黑 天空遠水明
年光秋漸索 客子夜猶行
村落知何處 時聞犬吠聲

北郭夜歸

北郭鐘初絕還家人倚舟縱橫燈映市突兀霧沉樓
月落羣星出天垂一水浮不知寒色重霜在木綿裘

十月

十月蹉跎盡嚴風忽滿城積寒裘失重綿雨榻生情
人事莽無際歲功垂又成凋零餘短菊帶眼得時明

暮春齋居卽事三首

經旬寡人事蹤跡小牕前暝色連殘雨春寒宿野煙
茗杯眠起味書卷靜中緣零落梅枝瘦風吹更可憐

其二

閒庭青草積春半思蒼茫小雨作寒食微風汎海棠
芳情經病減白日廢書長何物供歌枕縈簾一炷香

其三

翠箔晝重重寒深雨更濃碧鮮浮草色淺淡歛雲容
未遣愁欺病還資靜養慵蹉跎裘褐在強半負春穠

江船對月效樂天何處難忘酒

何處難忘酒江船對月時風聲傳語笑波影散須眉
遠火山浮動明河天倒垂此時無一觥水月負佳期

遊治平寺

落日淹遊艇循山小徑迂避喧欣得寺擇勝旋開厨
偃樹斜侵磴橫岡遠帶湖過春纔十日碧蔭已扶疎

次韻陳以可觀蒔秧

妻孥空舍出秧稻及時明匝岸清歌動分畦翠浪生
田家自村樂歲事卜蛙聲慚媿城中客長腰飯玉粒

次韻喜雨

睡起風吹面高樓急雨來新涼花竹喜殘病鬱蒸開
隔水荒煙合長空獨鳥回佳人應按曲白苧是初裁
獨坐

獨坐茆簷靜澄懷道味長年光付書卷幽事續鑪香
日出鳥鳥樂雨收花竹涼蕭閒習成懶不是寡迎將
夜坐

溽暑夜不寐涼風初解圍起看星漢動坐久語音稀
殘月耿猶在流螢忽自飛一聲何處鶴露下欲沾衣
不寐

展枕不得寐沉沉玉漏淹一燈寒照壁半夜雨鳴簷
有味畱貧在多愁與病兼髻邊新白髮應爲小詩添

新寒

木落見清真端居物自春牕虛蠅擊紙院靜鳥窺人
白日經簷短青衫卒歲貧新寒滿城郭欲出畏風塵

新年

擾擾復聞聞雞聲妨晏眠江城收宿雨衰髮受新年
寒盡梅花後春生草閣前郊原芳事近早問石湖船
對雨

獨吟池上雨拍拍水平堤暝色千峰合涼聲萬葉齊
翠承深竹重寒壓晚簷低怪得經過斷街頭一尺泥

題秋江圖

湖平失洲渚日落見帆檣鴈影天隨遠漁歌水自長
孤雲開浩蕩高興落滄浪欲采芙蓉去煙波正渺茫

次韻孫太初秋夜汎月之作

煙歛依依樹鷗飛漠漠田短蕭吹夜月高興落江天
遠火搖輕浪跳魚驚過船良辰不易得吾敢卜明年

秋晚

白日銷殘篆西風薄總幃文園無奈病衣帶不勝圍
墮葉兼零雨斜光暗夕扉天涯鴻鴈疾誰念稻梁微

九日不出

早衰憐暮景時叙每侵尋秋色籬花瘦柴門落葉深
索居成病嬾勝日負登臨樽酒正愁絕南樓急暮砧

重葺先廬履仁有詩奉答一首

基構百年謀依然四壁秋庭陰分柳色簷影帶雲流
客到從題鳳余生本類鳩稍令供燕祭此外復何求

再答一首

未遂入山居聊營背郭廬編茅蔭衡宇垂柳帶清渠
匪襲先人志慙淹長者亭北牕有涼吹臥展架頭書

立春日遲陳淳不至

東風吹綵燕曉色動簾旌遲子不時至南樓春自生
裁詩供帖子閣酒聽啼鶯白日流雲暖梅花初雪晴

西虹橋晚眺同九遠賦

從來佳麗地昌闔更雄華大舶浮江下飛樓帶郭斜
春旗搖落日暮堞倚晴霞天外踈煙合蘭橋入望賒

夏日簡履約

王子清虛甚蕭閒味道腴焚香供燕寢閉閣讀殘書
適俗無塵韻還山有竹居遙應苦喧雜伏日興何如

王婆墩次楊儀部韻

遙看塢一聚到只屋三間
嫗姓隨墩在僧廊得蘇殷
秋濃山照閣雨足水侵關
依舊刺船去回瞻樹杪欄
過孫文貴不在對庭中新竹

東禪寺

一室才容膝居然不受埃
恍如城郭外時有野人來
簷綠搖新竹堦紋蝕古苔
未妨酬對寡撫景自徘徊
古寺謝車馬清臨綠玉灣
雙禽啼竹逕獸犬護松關
落葉秋滿地夕陽僧自閒
偶來還自去回首碧天間

石湖作

落日淡煙消平湖碧玉搖
秋生茶磨嶼人在越城橋
樹色晴洲斷鐘聲古寺遙
西風吹短鬢還上木蘭橈

寒夜

茆屋寒初重無眠對燭光
踈砧何處月殘葉滿庭霜
攬物驚時改供愁有夜長
空餘強學志撫卷視茫茫
張明遠索畫久而未成
歲暮陰寒雪霰將集齋
居無聊爲寫溪山欲雪圖
并賦短句

歲暮天欲雪郊原風色饒
山寒增突兀樹暝入蕭條
野水照茅屋歸人爭斷橋
牕前有新句欲覓已寥寥
承天寺中隱堂

古徑無車馬閒門帶蔦蘿
秋風吹宿雨日暮吟庭柯
世味逢僧盡新涼入寺多
居山未有計此地數來過
雨中雜述四首

春歸楊柳暗四月雨垂垂
紅洗花無迹青沾草有私

倚樓迷曉望出郭滯幽期客去茶甌歇閒愁總上眉
其二

凝情不自得看雨獨登樓綠樹千門晚涼雲五月秋
暗梁栖濕燕高壁上枯牛有待新波長南湖弄小舟

其三

雨從四月晦數日尚愆晴潤與黃梅併寒侵白苧生
斷煙迷竹色懸溜雜雞鳴莫自嫌行潦東郊久待耕
其四

十月江城雨霖淫勢已滔簷端宿雲霧屋脚卷波濤
已掃蘇端迹仍深仲蔚蒿無錢供晚醉行儼質春袍
歲暮齋居

陋巷還車馬高齋漫簡編塵埃銷短日雨雪入殘年

攬照空雙髻探囊有一錢西風灑修竹吾意已蕭然
南樓二首

南樓冰雪盡江郭歲年窮暮嶺延西日枯條振北風
孤雲天一握萬事髻雙蓬徙倚青煙滅蕭條在眼中
其二

西山開晚霽返照落牕中歲事收殘雪生涯入斷鴻
寒多裘失重愁劇酒無功零落雙桐樹蕭蕭不受風
登上方

春風吹白髮醉上碧岩巉帆落天邊雨人行樹裏橋
舞臺青草合霸氣白煙消吳越橫分地登臨不自聊
陳以可近歲築室陳湖專理農業時以詩見寄
誇其所得比來秋成當益樂輒賦秋晚田家樂

事十首寄之

築室姚江上陳湖東復東舊諳風俗厚近喜歲年豐
晚醉茅柴酒朝羨踏地菘村居今已習那復念城中

其二

甲第城中好何如小隱家翦茆苦屋角引蔓束籬笆
社動喧村鼓場乾響稻枷誰言田舍苦隨分有年華

其三

艇子新浮水移來傍釣磯新晴觀穫去薄暮汎湖歸
斜日牛眠隴秋風犬護扉行邊衝鴨陣時掠野田飛

其四

秋雨初晴後秋風滿稻畦笑歌村遠近煙火舍東西
紫擘輸芒蟹黃烹啄黍雞相過有田父日日醉如泥

其五

秋事相將盡農勤亦告終風高陂水涸霜落稻畦空
說尹遭田父穰年賽社公不妨多釀秫今歲頗豐融

其六

散步蒲爲屨端居衲御風觀儼逐鄰里築圃課兒童
誰識佳公子真成田舍翁只應吟興在時復走詩筒

其七

早畢婚嫁累便爲田舍謀水租魚十頃園戶竹千頭
省事官無擾勤身歲有秋有時携短策尋壑更經丘

其八

日落山圍屋霜清水映門魚蝦時作市雞犬自成村
新味香粳飯常情老瓦盆渾家得醉飽時事更休論

其九

廩充官稅足歲晏樂何如自和田園詠閒修種樹書
清溪照茆屋寒雨暗村墟時有東鄰叟携壺慰索居

其十

湖田半栽秫秋至釀先成早辦兼旬醉聊償一歲耕
淵明無俗韻子幼善秦聲莫怪踈狂甚相歡答太平
虎丘千頃雲閣

閣外雲千頃風前首重搔倚闌雙鳥下落日亂山高
積水連橫浦踈松帶遠臯冷然發清嘯吾意欲凌囂

賦鉞梅

斷枝黏碧蘚殘蕊疊冰紈未乏溪山韻尤宜几格看
移燈傳壁影垂箔護春寒應斷西湖夢東風在席端

賦盆蘭

清真寒谷秀幽獨野人心結意清霞佩傳情綠綺琴
德馨堪自近道味許誰深一笑歌璫樹春風雪滿襟

關川八詠

關川幽居

有美神明後關川古世家人情隨里善第宅帶山斜
高木雨添蔭清流月映沙莫憐城市好車馬正紛華
唐關清隱

空巖帶流水回合自成關有客居盤谷何時賦小山

編籬護修竹引釣俯蒼灣見說遺塵累春來事事閑

墓山牧笛

何處聞悲調隴頭孤笛鳴月明人跨犢風細谷傳聲

鬱鬱佳成思漫漫長夜情孤兒正愁絕原樹答凄清
規山漁歌

短棹白蘋渚清歌黃帽郎隔雲傳款乃背雨入滄浪
日落暮山碧天空煙水長西風吹不散秋色滿江鄉
隔峰嵐氣

隔峰當戶牖嵐氣掃晴空短笏迎蕭爽踈簾捲鬱葱
晚煙明滅外秋色有無中莫道渾如畫還應畫未工
屏阜書聲

吾伊聲不惡宛轉出崇岡茆屋四簷靜短檠中夜涼
能來問字客雅稱育賢鄉清韻松篁外悠然道味長
雙溪明月

見說雙溪好秋來更渺然漫流寒漾月夜色遠浮天

斗酒黃泥坂宮袍采石船謫仙今寂寞勝事屬誰傳

萬貫晴川

江上春潮落晴洲帶渺茫中流分樹色斜日送蘋香
斷鴈迷千里荒雞自一鄉
坳雲歸別浦依約見帆檣
追和錢舜舉山居韻

翠深山帶屋綠淨水通門泉石情還重丘園道自尊
種莎添野色畱竹護籬根樂事惟心會休逢俗子論
雨宿武城追和先温州夜宿武城二首

長河風雨送盡日傍滄洲白浪灘都沒青楓葉亂流
百憂雙短髻千里一孤舟日暮墟煙合荒寒滿舵樓
其二

經過言偃邑非復昔時城里俗無從問絃歌空有名

江湖孤燕斷風雨亂雞鳴酒醒青燈暗春寒一夜生

紫氣

紫氣龍顏穆彤墀虎衛森萬年占帝運一念格天心
日月何虧食華夷仰照臨誰應知有喜白首添詞林

頒曆

鳳曆從天下千官列陛前青陽壺史奏黃帕侍中傳
周禮存頒朔堯書重紀年白頭供奉裏慙媿得春先
旅懷

陰凝冰未泮雪盡歲還窮世事浮榮外生涯久病中
心旌搖落日天影度冥鴻短髮垂垂白那堪犯朔風
野行因過廢寺

久客念搖落行行還寂寥餘寒棲短褐斜日帶荒寮

歲事行將盡羈魂黯欲銷雲房才只尺便覺遠塵囂
才伯過訪

落日生愁地窮陰欲雪天歸心聞斷鴈衰髯逼殘年
光景陳編裏情懷薄酒邊平生黃叔度相見卽欣然
對酒

晚得酒中趣三杯時暢然難忘是花下何物勝樽前
世事有千變人生無百年還應騎馬客輸我北牕眠
觀書

老眼視茫然時時手一編未能忘習氣聊復遣餘年
欹枕山牕下篝燈細雨邊誰應知此味自結靜中緣
煮茶

絹封陽羨月瓦缶惠山泉至味心難忘閑情手自煎

地鑪殘雪後禪榻晚風前爲問貧陶穀何如病玉川
晏起

林下將迎寡頽然萬事捐老知閑有益病與嬾相便
殘夢荒雞外輕寒總帳前從教貧到骨不負日高眠
梁溪道中夜行

雨餘新水漫風外一帆輕山繞湖南去人從畫裏行
天空雲樹渺月出暮潮平煙靄知何處漁歌時一聲

石湖春遊

湖光披素練野色漲青煙一雨樹如沐千林花欲然
踈鐘白蓮社新水木蘭船行樂須春早山頭有杜鵑

四月

風雨將春去清和四月天桐陰搖白日草色散青煙

興寄琴樽外筋骸杖履前若爲消永晝牕下有殘編
其二

春雨綠陰肥雨晴春亦歸花殘鶯獨嘯草長燕交飛
香篋青繒扇筠筠牕白葛衣拋書尋午枕新暖夢依微

五月

逕草侵衫色庭梧生晝陰時光臨角黍穡事望梅霖
習靜鑪熏細醒煩茗椀深草堂賓客散欹枕聽幽禽
夜坐

涼聲傳漏點夜色轉樓陰遙漢三星度空庭萬籟沉
草輝螢箇箇樹影月林林稍覺塵氛遠閒愁不上心

夏日

境寂晝偏永心清暑氣微老兼踈筆研性復懶裳衣

隱几雙桐轉寒簾獨鳥飛茗薰聊自適不怪客來稀
待月

夜色動虛楹南樓遲月生碧煙消欲盡銀漢寂無聲
瀲灩金波湧參差玉樹明隔溪人未臥把酒坐吹笙
和陳魯南二色蘭

秋色一籬雨寒英百翦霜宮粧嬌映額后服淡生香
燦爛裴蹄重襪襪鵠羽長西風不相負歲歲有重陽
右黃菊

閒淡歲寒姿金行自及時月明霜翦翦秋淨玉差差
短翅蝶迷粉脩翎鶴有儀瑤華誰與賦寂寞自東籬
右白蘭
射讀早行

夜色載扁舟滄江帶月流櫂聲撩吠犬燈影觸眠鷗
星漢疑搖動煙林遠欲浮不知霜併下寒重木綿裘
其二

長林風策策孤棹夜冥冥天濶水煙白月寒漁火青
素衣沾墜露短髮戴踈星彼美誰家子吹簫下遠汀
石湖汎月

愛此陂塘靜扁舟夜不歸水兼天一色秋與月爭輝
浦近青山隱沙明白鷺飛坐來風滿鬢不覺露沾衣
迎春日風雨齋居漫述二首

迎春春欲至風雨暮交加未說迷牛馬真成濕歲華
林無霜後葉梅有臘前花客散虛齋寂風簷自煮茶
其二

風雨餞殘臘梅花迎早春病淹愁緒在鬢與物華新
短褐栖餘冷重簾細暗塵不嫌門寂寞時有問奇人

文太史詩

文太史詩

翰林院待詔兼修 國史文徵明 徵仲
七言律詩

謁江浦莊先生畱宿定山草堂

十畝青松四面山草堂宛轉亂流間若非清福安能
主爲訪高人得暫閒竹圃眠雲秋濯濯水春孤枕夜
潺潺就中何事尤堪羨國是人非了不關

重至滁州同諸友遊琅琊

兼旬行李滯滁州不到琅琊亦枉畱飲伴况來多舊
好山靈應不厭重遊四時風景初無恙千里登臨易
起愁安得移家終此住讀書朝暮對溪流
再至定山辱莊先生贈詩次韻奉答

穉齒窮身豈有知，偶陪高論得移時。
感公不以愚頑棄，顧我何堪遠大期。
草閣便須終歲住，僕人休訝出山遲。
歸來乞得堯夫句，暮雨秋燈不斷思。

附錄莊公贈詩

一燈何處寫相知，對坐寒牕暮雨時。
詩本平生非杜甫，琴才臨老遇鍾期。
儘堪出手名家早，但覺忘年得友遲。
儻許無言真妙意，欲將千載慰深思。

暮春

高榆風定翠相圍，天氣悠揚思轉微。
書閣凝香新試扇，春肌生汗欲更衣。
乍聞幽鳥渾無見，時墮遊絲忽漫飛。
惆悵東闌尋曉夢，落花芳草已都飛。

奉次吳匏庵先生續潘邠老詩韻

滿城風雨近重陽，暝色寒聲漫繞堂。
向去陰晴難逆料，邇來牢落已粗嘗。
直饒詩思如秋淡，未害臞顏映菊黃。
好事例乖何用歎，但令有蟹薦桑郎。

田舍

秋風田舍有閒情，野老迎賓喜不勝。
小徑穿松敷細石，短籬綠水束枯藤。
堆盤蝦蟹輸村樂，匝屋雞豚驗歲登。
却戀城居畱未得，晚山回首白煙凝。

詠芙蓉

九月霜清卉草荒，拒霜池上獨宜霜。
誰憐憔悴春無主，賴是遲迴晚自芳。
太液風煙情黯黯，仙人城闕事茫茫。
幽貞自有金莖菊，相對踈籬各淡粧。

十月

江南十月乍風埃，簾箔垂寒晝不開。身計蕭蕭存斷
簡，人情黯黯付深杯。雨中秋事芙蓉盡，霜後時新橘
柚來。抱病經旬賓客減，臥看香鼎篆縈迴。

停雲館燕坐有懷昌國

山館無人午篆殘，便閑經日不簪冠。時憑茗碗驅沈
困，聊有書編適燕歡。漠漠黃梅生濕潤，纖纖白苧試
輕單。梧桐小砌陰如許，不得君來共倚欄。

與邢麗文登葑門城樓

天風異制木蛇空，雉堞差差夕照中。百里山川形勝
舊，萬家煙火歲年豐。迤南茂苑迷陳跡，直北荒原識
故宮。會取千年興廢理，與君極目送飛鴻。

次韻答希哲見懷兼乞草書

墻外車音寂不聞，閒緣誰解病中紛。涼風著急吹芳
樹，落日含情詠碧雲。高誼乍違黃叔度，清篇先枉沈
休文。秋來定有臨池興，榻得鵝羣儻見分。

懷錢孔周徐昌國

時應試南京

停雲寂寞病中身，旅夢秦淮夜夜新。見說踏槐隨舉
子，終期鳴鹿薦嘉賓。人言漫漶真無據，吾道逶迤合
有伸。想見馬蹄輕疾處，薄羅微染帝京塵。

叔父侍御致仕詩二首

聖恩剛遂我公私，乞與閑身未老時。行樂擬裁居士
服，入山誰送草堂貲。浮雲多態何當散，高鳥無求不
可羈。明月青山一杯酒，閑情未許俗人知。

其二

詔許先生解舊官依然豸繡賁丘園孤危宜負平生
志歸宿還叨曠蕩恩誰謂今人無古道欣看盛事出
家門從今只辦溪山樂世事如棋不足論

奉陪呂太常沈石田遊虎丘次韻

高賢尋壑共經丘偶得追從續舊遊陸羽泉甘春試
茗王珣祠古暮維舟風簷落落鈴相語雨徑登登屐
似油怪是酣吟留不去水雲千頃正當樓

金陵客樓與陳淳夜話

卷書零亂筆縱橫對坐寒牕夜二更奕世通家叨父
行十年知己愧門生高樓酒醒燈前雨旅榻秋深病
裏情最是世心忘不得滿頭塵土說功名

立春日病起

十二月念三日

青絲裹餅薦春盤喜見鞭春在臘前便與一冬除舊
病尚餘七日是殘年梅花消息嚴寒後綵勝情懷薄
酒邊旋取物華供帖子暖痕浮綠草生煙

初六日與客自葑門汎舟至東禪小集

淺痕霏綠澹煙光遠樹依依春水長落日五人浮野
艇東城三里到溪堂

寺有青溪堂

餘寒人日梅枝瘦半醉

僧寮菜飯香轉信投閒閒不得題詩還博靜中忙
人日停雲館小集

新年便覺景光遲猶有餘寒宿敞帷寂寞一杯人日
雨風流千載草堂詩花枝未動臨佳節菜飯相淹亦
勝期春色到今深幾許小山南畔草痕知

詠孔周

圍坐清談麈尾長墨痕狼籍練裙香水亭紈扇歌揚
柳春院琵琶醉海棠王謝風流才子第齊梁煙月錦
篇章豪華豈是泥沙物好在揮毫白玉堂

春日舟行書所見

日出吳山歛霧蒼平橈十里下橫塘弄春草色偏宜
遠繞竹溪流不覺長一塢人煙自花柳千畦麥菜間
青黃不因出郭供人事負却風光二月強

重陽前一日飲孔周有斐堂

塵土欺人兩月忙深秋才上故人堂却憐違濶翻情
厚不覺淹畱入話長翠箔香風吹桂子布袍寒信作
重陽百年辛苦還防死好對良辰盡此觴

鄭太古送慧泉試吳大本寄茶

醉思雪乳不能眠活火砂餅夜自煎白絹旋開陽羨
月竹符新激慧山泉地爐殘雪貧陶穀破屋清風病
玉川莫道年來塵滿腹小牕寒夢已醒然

歲暮齋居卽事

簷樹扶蘇帶亂鴉蕭齋只似野人家紙牕獵獵風生
竹土盎浮浮火宿茶日色射雲時弄彩雨絲吹雪不
成花庭中卉物凋零盡獨有蒼松領歲華

謝永嘉趙君澤寄蘭

草堂安得有琳琅傍案漪蘭奕葉光千里故人勞解
珮一牕幽意自生香夢回涼月甌江遠思入秋風楚
畹長漸久不聞餘列在始知身境兩相忘

金陵詠懷

鍾山日上紫煙收金闕參差萬瓦流帝業千年浮王
氣都城百雉隱高秋聲華誰覓烏衣巷形勝空吟白
鷺洲回首壯游心未已西風策馬看吳鉤

詠玉蘭花

孤根疑自木蘭堂怪得人呼作女郎繞砌春風憐謝
傳一天明月夢唐昌冷魂未放清香淺深院誰窺縞
袂長漫說辛夷有瓜葛後開應是愧穠粧此花以辛夷接本

賀九嶺

相傳爲吳王賀重九處

截然飛嶺帶晴嵐路出餘杭更繞南往跡漫傳人賀
九勝遊剛愛月當三巖前鹿繞雲爲路木末僧依石
作菴一咲停輿風拂面松花閒看落毵毵

三月

三月江南柳色勻海棠風暖駐游塵山齋病起詩逋
積曲巷春晴轍跡新習氣未忘聊應世虛名何益漫
勞人閒來自理幽居事莫道花時不稱貧李咸用詩
衰世難行

道花時
不稱貧

遊吳氏東莊題贈嗣業

渺然城郭見江鄉十里清陰護草堂知樂漫追池上
跡振衣還上竹邊岡中有知樂亭
振衣岡東郊春色初啼鳥前
輩風流幾夕陽有約明朝汎新水菱濠堪着野人航

詩人孫太初過訪

把劍南來賦遠遊又看東上浙江舟山齋動是經時
別菜飯聊看半日留醉裏江湖真有味春來花鳥正
關愁天台鴈蕩平生夢憑仗詩囊次第收

暮春雨後陳以鈞邀遊石湖遂登治平
貪看粼粼水拍堤扁舟忽在跨塘西千山雨過青猶
滴四月尋春綠已齊湖上未忘經歲約竹間覓得舊
時題晚煙十里歸城路不是桃源也自迷

次韻王秉之新莊書事

背郭通村小築居任心還往樂何如山中舊業千頭
橘水面新租十畝魚未遂隱謀聊避俗不忘壯志有
藏書抱衾曾借西齋榻回首題詩十載餘

與宜興吳祖貽夜話有作就簡李宗淵杭道卿

吳克學

有客扁舟自陽羨夜堂風雨對高眠不辭談笑成佳
會祇覺淹留宿緣別後交遊如夢裏意中山水落

樽前青燈酒醒還生戀明日煙波更渺然

寄陳以可乞米

秋風百里夢姚城無限閑愁集短檠零落交遊懷鮑
叔逡巡書帖媿真卿謀身宜信貧難忍食指其如累
不輕見說湖南風物好何時去買薄田耕

宿相城有懷石田先生

何處重占處士星草堂突兀夜燈明風流已與人都
盡手澤空憐物有情依舊短墻圍野色不禁高樹之
秋聲傷心未了生前約漁子沙頭一棹橫

金陵秋夜與彭寅之湯子重步月

雙闕深沈夜向闌碧天露下葛衣單風吹急析嚴城
閉月照行人古道寒往事悠悠歌鳳去青山靡靡識

龍蟠壯懷萬里同遊在滿目風煙引劍看

道復西齋古石

玲瓏蒼壁太湖姿浪蝕沙陶面面竒百穴晴牕通玉
女一拳小石夢仇池乍逢合下南宮拜欲詠還輸白
傅詞便擬高齋題列岫朝來秀色滿檐帷

新正四日雪後方崑山思道過訪值余不在畱
詩而去奉答一首

偶扶藜杖出柴荆虛却王猷過訪情高興自緣脩竹
住通家還許小兒迎百年契分叨君厚一咲閒緣媿
我輕畱得新詩珠滿案紙牕殘雪共光榮

楊儀部君謙纂述之餘頗修淨業瞻對無由悵
然成詠

不見高人動經月似聞觀道獨澄懷一函自課維摩
品百日方持白傅齋春到梅花開小閣夢回涼月印
空階從知不受風塵累二十年前已乞骸

子重賦詩徵余逋畫未卽踐言先以小幅展限
就和來押

飛嵐疊巘翠撐空畫得幽居似剡中滿地清陰山木
合隔溪野色小橋通倚闌詩思蕭蕭雨繞竹茶煙細
細風想得高人方閉戶那知市上軟塵紅

夏意

五月江南櫻筍殘踈花吹盡綠漫漫雨來恰及梅黃
候春去猶餘麥秀寒白日幽深茆屋靜野情蕭散苧
袍寬美人何處經時別滿耳新蟬獨倚闌

次韻九逵山中步月

黃葉蕭蕭沒斷踪，風將牢落入窮冬。三更酒醒人何處，千里月明山自重。遠水浮村微見火，碧煙藏寺但聞鐘。知君逸思難分付，都屬尋詩七尺筇。

虎丘劍池

吳王埋玉幾千年，水落池空得墓磚。地下誰曾求寶劍，眼中吾已見桑田。金鳧寂寞隨塵劫，石闕分明有洞天。安得元之論往事，滿山寒日散蒼煙。

石湖

橫塘西下水如油，拂岸垂楊翠欲流。落日誰歌桃葉渡，涼風徐度藕花洲。蕭然白雨醒煩暑，無賴春山破晚愁。滿目煙波情不極，遊人還上木蘭舟。

席上題扇景壽外舅大叅吳公

解組歸來歲五更，天教閒散養脩齡。東華風浪今無夢，南極休徵已見星。閱世儘容醒眼白，倚樓自愛晚山青。扁舟或獻南飛曲，憑仗東坡醉裏聽。

雞鳴山金陵勝處往歲蓋屢遊之未有作也偶閱九逵遊憑虛閣記追賦一首

金陵佳麗石頭城，傑閣登臨正雨晴。帝業繡雄維扈踞，遊人選勝得雞鳴。長江天際孤帆滅，落日煙中萬瓦明。滿目廢興題不得，獨看名畫繞廊行。

與外甥陸之箕夜話

安甫子

一咲燈前覩陸雲，後生殊是逼吾頻。文章有待成先志，眉目分明見故人。潘岳任咸千載恨，何充王導一

家親虛齋短榻寒相對禮數雖疎意却真
上巳日獨行溪上有懷九達

郭外青煙柳帶柔洞庭西去水悠悠故人不見沙棠
楫燕子齊飛杜若洲日落晚風吹宿酒天寒江草喚
新愁佳期寂寞春如許辜負山花插滿頭

寒食自橫金歸汎石湖

澤國春深霧雨收越城橋畔水爭流斷煙西去浮蒼
嶼斜日中川起白鷗村店寂寥寒食節行人迢遍木
蘭舟芳晴滿日東風急欲採汀花不自由

侍柱國王先生西園游集

園在夏駕湖上

名園詰曲帶城闈積水居然見遠津夏駕千年空往
迹午橋今日屬閑人江南白苧迎新暑雨後孤花殿

晚春自古會心非在遠等閒魚鳥便相親

附王先生次韻

吳王消夏有殘闈特起幽亭謝要津曲徑轉時迷到
客短墻缺處見行人綠楊動影魚吹日紅藥畱香蝶
送春爲問午橋閑相國自非劉白更誰親

百花庵

北郭名藍舊有名歲長無復百花深柴門日落空流
水古木春來長綠陰滿眼風流文字業一龕荒寂道
人心野橋詰曲通幽徑短策何時許重尋

詠庭前藜菊

寒英翦翦弄輕黃百卉凋零見此芳天意也應憐晚
節秋光端不負重陽郊原慘淡風吹日籬落蕭條夜

有霜輸與陶翁能領畧南山在眼酒盈觴

秋夜

新寒高閣夜何其野笛荒砧不斷思澤國變衰菰菜
老長安迢遍帛書遲江空露下芙蓉葉月出風吹桂
樹枝何必潘郎能自省年來青鬢已絲絲

賦得野亭秋興

斷雲狼籍近簾櫳天地蕭條四壁空盡日倚闌黃葉
雨一番吹鬢白蘋風年光搔首孤鴻外山色供愁落
照中欲寄閑情無那遠煙波江上採芙蓉

贈王履約履吉兄弟

春風觸目總琳琅素月流雲縹緲光未用寡辭推子
敬故應相敵有元方百年有待麟呈瑞千里欣看鴈

逐行手結幽蘭成雜珮思君欲贈不能將

揚州

竹西簫管玉參差柳外樓臺舞陸離落日蕪城非故
國春風后土有荒祠錦帆煙月千年夢禪榻情懷兩
鬢絲二十四橋何處是扁舟西去不勝思

先大父有宿汶上之作舟中閱先集敬次嚴韻
日暮風霾欲漲天獨臨古渡意悽然春光三月行當
暇客子長途未息肩白漫河流還岸岸綠垂楊柳自
芊芊當年汶上城何處一抹斜陽萬樹煙

過張秋追懷武功先生遺跡

投薪沉鐵事悠悠巨掃千尋壓上游河濟從來天下
盡江淮今入地中流當時物論輕文士千載行人仰

壯猷人事幾回桑海異依然高碣鎮東州

魏家灣有感

博平縣地也

博平縣裏侍親時四十年來兩鬢絲竹馬都非前日
夢枯魚空負此生悲已無父老談遺事獨有聲名繫
去思憔悴平生塵土跡魏家灣水會能知

柳色

漫說鶯兒色似油何如楊柳綠幽幽初收宿雨濃於
染遠映新波翠欲流十里蟬聲溪上路一痕斜照驛
邊樓莫言濯濯無人愛別有春光在御溝

懷石湖寄吳中諸友

江梅千樹繞楞伽記得臨行盡著花青子熟時應憶
我綠陰成處正思家聽鶯此際堪移酒燒竹何人共

煮茶幾度扁舟夢中去不知塵土在天涯

午門朝見

祥光浮動紫煙收禁漏初傳午夜籌乍見扶桑明曉
仗却瞻閭闔覲宸旒一痕斜月雙龍闕百疊春雲五
鳳樓潦倒江湖今白髮可能供奉殿東頭

奉天殿早朝二首

天外鳴鞭肅禁宸朝廷獻納有司存杲恩拂曙樓臺
迥象魏連雲觀闕尊夾陛書思端萬笏上方求諫闢
千門宮墻樹色深於染總受天家雨露恩

其二

月轉蒼龍闕角西建章雲歛玉繩低碧簫雙引鸞聲
細綵扇平分雉尾齊老幸綴行班石陛謬慙通籍預

金閨日高歸院詞頭下滿袖天香拆紫泥

雨中放朝出左掖

霏微芳潤浥霓旌歷落彤墀散履聲暝色浮煙迷左掖碧雲將雨近西清柳垂青瑣千絲重水落銀橋萬玉鳴沾灑不辭袍袖濕天街塵淨馬蹄輕

雪後早朝

月滿長安雪未消分明銀海瀉秋濤光迷萬馬瑯珂亂勢壓雙龍玉闕高曙色漸分鳩鵲觀凝寒猶在鸛鷖袍負薪亦有號饑者願得君王發漢馭

元旦朝賀

仙音縹緲協和鸞天上春回白玉闌日出雞人徐唱卯雪消風伯爲驅寒萬方玉帛看王會一歲儀文重

履端滿目昇平題不得白頭慙愧直金鑾
進春朝賀

玉殿千官拜冕旒紫衣京兆在前頭四時盛德初臨木先日嚴寒已送牛氣轉蒼龍當法駕風回明庶動宸遊聖王和令思行慶次第頒恩下九州

恭候 大駕還自南郊

聖主回鑾肅百靈紫雲團蓋翼蒼精屬車劍履星辰麗先駕旂常日月明十里春風傳警蹕萬方和氣協韶讌白頭欣覩朝元盛願續思文頌太平

觀 駕幸文華聽講

朝下鸞輿幸講堂徐看天仗轉東廂翠旂拂柳宮墻繞清蹕穿雲閣道長千載明良真際會九朝文物舊

蘇州詩
三
夔章小臣漫厠夔龍後彷彿還瞻日月光

慶成宴

花映珍盤出上供風吹韶護落遙空坐聯日馭紅雲
暖恩湛宮壺瑞露融一代禮成郊社後百年身際太
平中晚酣不記歸來處彷彿春光玉殿東

再與慶成

日射宮花淑景柔春風重醉殿東頭嫚姍不厭倡優
拙宣觀親承禮數稠天上露華恩湛湛庭中和氣鹿
呦呦一聲響節驚禽散錦服中官進御羞

實錄成賜燕禮部

北府書成奏尚方南宮拜詔許傳觴青春照坐宮花
麗瑞露浮樽法酒香邂逅鸞臺修故事遂令牛走被

餘光濃恩恰似朝來雨散作槐廳六月涼

臘日賜燕

綺筵錯落映朱旗百辟承恩燕赤墀薦蜡尚存周典
禮賜醕聊舉漢官儀中厨次第催傳胛列坐雍容各
覆卮潦倒不慙書獵字殷勤還賦伐檀詩

端午賜扇

剡藤湘竹巧裁將珍重瑤華出尚方四海清涼初拜
賜一時懷袖總生光最憐明月難捐棄卽有仁風可
奉揚真覺自天題處濕墨痕狼籍露華香

賜長壽綵縷

紫宸朝下錫靈絲金水橋邊拜命時文繡自天騰五
色光華約臂結雙螭重慙潦倒隨恩澤還忝班行觀

盛儀願得君王千萬壽日華常照袞衣垂

實錄成蒙 恩賜襲衣銀幣

雙銀爛爛出朱提稠疊文繒五色絲 天子不遺牛
馬走侍臣還忝鳳凰池青霄寵渥兼金重白首遭逢
補袞遲狼籍天香攜滿袖春風湛露寫新詩

再賜銀幣

流銀嘉幣上方琛晝錫駢蕃雨露深朽質何堪施綺
殺虛名元自愧南金敢忘珍重酬千載圖補絲毫有
寸心白髮茂恩何所自三年供奉忝詞林

翰林齋宿

春星爛熳燭薇垣獨擁青綾向夜闌宮漏隔花銀箭
永蓮燈垂燼玉堂寒坐聆宵柝霜圍屋想見郊禋月

滿壇鈴索無風塵土遠始知仙署逼金鑾

興隆寺致齋

漠漠香燈佛座前寢衣相對不成眠明禋夙奉廷中
戒清淨來修物外緣竹樹湘簾新月色鬢絲禪榻舊
風煙無端忽憶朝元事笑隔春風又一年

內直有感

天上樓臺白玉堂白頭來作秘書郎退朝每傍花枝
入俛直遙聞刻漏長鈴索蕭閒青瑣靜詞頭爛熳紫
泥香野人不識瀛洲樂清夢依然在故鄉

禁中芍藥

仙姿綽約絳羅紳何日移根傍紫宸月露冷團金帶
重天風香泛玉堂春千年想見翻堦詠一笑羞稱近

侍臣不似人間易零落上方元自隔凡塵

遊西苑

宛轉瀛洲帶幔坡
螭蜷玉竦壓銀河
廣寒遙見空中樹
太液微生雨後波
雲捲紅粧千步障
鳳吹瑤蓋萬年柯
太平見說宸遊簡
馳道青青長薜蘿

秋日再經西苑

內苑秋清宿露晞
盈盈日采動金扉
松間翠殿團華蓋
天外銀橋入紫微
錦纜稀遊青雀暗
瑤波無際白鷗飛
彤墻高柳無人折
時見中官一騎歸

西苑詩十首

嘉靖乙酉春同官陳侍講魯南馬修撰仲房王編修繩武偕余爲西苑之遊先是魯南教內書堂識

守苑官因得盡歷諸勝旣歸隨所記憶爲詩十篇

萬歲山

日出靈山花霧消
分明員嶠戴金鼇
東來複道浮雲迥
北極觚稜王氣高
仙仗乘春觀物化
寢園常歲薦櫻桃
青林翠葆深於沐
總是天家雨露膏

大液池

泱泱滄池混太清
芙蓉十里錦雲平
曾聞樂府歌黃鵠
還見秋風動石鯨
玉竦螭蜷垂碧落
銀山縹緲自寰瀛
從知鳳輦經遊地
鳧鴈徊翔總不驚

瑤華島

海上三山擁翠髮
天宮遙在碧雲端
古來漫說瑤臺迥
人世寧知玉宇寒
落日芙蓉煙裊裊
秋風桂樹露

團團勝遊寂寞前朝事誰見吹簫駕綵鸞

承光殿

小苑平臨太液池金鋪約戶鎖蟠螭雲中帝座飛華蓋
城上鈎陳繞翠旗紫氣曾迴雙鳳輦青松猶有萬年枝
從來清蹕深嚴地開盡碧桃人未知

龍舟浦

列殿陰陰水竇連漢家帝子有樓船蘭橈桂楫曾千里
錦纜牙檣憶往年汾水秋風空落日隋隄楊柳漫清煙
今皇別有同民樂不遣青龍漾碧川

芭蕉園

小山盤折翠嶺呀松檜陰陰輦道斜草長蘭亭迷曲水
雨深桃洞自飄花紫雲依舊圍黃屋青鳥還應識

翠華知是史臣焚草地文光隱隱結紅霞

樂成殿

太液東來錦浪平芙蓉小殿瞰虛明碧欄醮影雙龍臥
綠水浮渠九島輕漾日金鱗堪引釣拂天翠柳亂聞鶯
激流靜看飛輪轉天子無爲樂歲成

南臺

青林迤邐轉迴塘南去高臺對苑墻煖日旌旗春欲動
薰風殿閣晝生涼別開水榭親魚鳥下見平田熟稻梁
聖主一遊還一豫居然清禁有江鄉

兔園

漢王遊息有離宮瑣闥朱扉迤邐通別殿春風巢紫鳳
小山飛澗架晴虹團雲芝蓋翔林表噴壑龍泉轉

地中簡朴由來堯舜事故應梁苑不相同

平臺

日上宮墻飛紫埃先皇閱武有層臺下方馳道依城
盡東面飛軒映水開雲傍綺䟽常不散鳥窺仙仗去
還來金華待詔頭都白欲賦長揚愧不才

丙戌十月十日致仕出京二首

獨驅羸馬出 楓宸回首長安萬斛塵白髮豈堪供
世事青山自古有閑人荒餘三徑猶存菊興落扁舟
不爲尊老得一官常臥病可能勲業上麒麟

其二

白髮蕭疎老秘書倦遊零落病相如三年虛索長安
米一日歸乘下澤車坐對西山朝氣爽夢回東壁夜

牕虛玉蘭堂下秋風早幽竹黃花不負余

阻水路河簡同行黃才伯

長河十月朔風悲零落貂裘不受吹冰雪崢嶸驚歲
晚江湖寂寞滯歸期誰憐阮籍窮途泣自笑穰侯見
事遲忽憶同行黃太史篝燈何處擁書帷

丁亥元旦次才伯韻

東風早晚到天涯客子逢春正憶家栢葉漫傳元旦
酒江梅應發故園花不愁逆旅無親戚依舊江湖有
歲華深負鄭莊騰薦剡遊巖痼疾久煙霞

聞鴈有懷

尺書不至意茫茫酒醒俄驚鴈北翔迢遞秋聲連朔
漠蹉跎歸思滿衡湘五更風雨青燈暗萬里江湖白

髮長四海平生幾兄弟年來凌亂不成行

水泮次才伯韻

吹面東風不作寒斷冰千片下晴灘
已知積雪經冬盡正好垂楊映水看
滿目江山勞應接到家櫻笋未
闌殘只應今夜扁舟夢先繞吳門鬪鴨欄

還家志喜

綠樹成陰逕有苔園廬無恙客歸來
清朝自是容疎嬾明主何嘗棄不才
林壑豈無投老地煙霞常護讀書臺
石湖東畔橫塘路多少山花待我開

玉磬山房

橫牕偃曲帶脩垣一室都來斗樣寬
誰信曲肱能自樂我知容膝易爲安
春風薙草通幽徑夜雨編籬護

藥欄咲殺杜陵常寄泊却思廣厦庇人寒

石湖

石湖煙水望中迷湖上花深鳥亂啼
芳草自生茶磨嶺畫橋東注越來溪
涼風嫋嫋青蘋末往事悠悠白日西
依舊江波秋月墮傷心莫唱夜烏栖

遊支硎天平諸山

麥隴風微燕子斜雨晴雲日麗江沙遙
尋支遁煙中寺初見天平道上花
過眼溪山勞應接方春草柳發光華
夕陽半嶺歸輿急慚媿城中自有家

煎茶贈履約

嫩湯自發魚生眼新茗還誇翠展旗
穀雨江頭佳節近惠泉山下小船歸
山人紗帽籠頭處禪榻風花繞

鬢飛酒客不通塵夢醒臥看春日下松扉

喜雨

弱雲將暝暗松關急雨蕭然落坐間山鳥近人呼滑
滑春泉隔屋送潺潺小牕破睡茶甌淺別院生涼羽
扇閒滿目新詩題不得登樓自看郭西山

人日杜氏南樓題贈允勝

城上殘雲爛熳垂樓頭人日喜晴時聊從節物占人
事未放春風負酒卮病後光陰新白髮江南消息早
梅枝草堂故事詩篇在應許多情杜甫知

冬日謝克和送嶰

勞遣霜臍到酒邊眼看郭索已垂涎翠螯啄雪真堪
把赤甲含膏更可憐湖上人家收籩後江南風物看

燈前

吳中有看燈蟹

居然動我江山興不忘詩人後惠連

春雨漫興

春雨蕭蕭草滿除春風吾亦愛吾廬高情時誦閑居
賦老眼能抄種樹書金馬昔年貧曼倩文園今日病
相如焚香燕坐心如水平任門多長者車

雨後

積雨初收風乍顛城南花事已茫然黃鸝繞樹空千
轉白髮傷春又一年竹几蒲團供坐睡茗杯香鼎有
閒緣客來莫話長安事自理南華物外篇

趙侍御麗卿邀遊冶城

落木蕭蕭帶雨空冶城高處見秋風重將白髮遊江
左依舊青山似洛中有客樽前談夢鹿何人天際慕

飛鴻荒墩寂寞埋秋草猶自風流憶謝公

徒步至寶光寺

布襪青鞋短褐衣酒樽詩卷一僮隨白頭自咲曾供
奉徒步誰憐老拾遺五畝喜聞秔稻熟重陽還恨菊
花遲松寮竹谷逍遙地時有山僧乞小詩

九日與彥明登雨花臺

雨花臺上雨初乾野色江光落坐間豈謂旅遊逢九
日共來把酒對三山老年節物偏生感到處雲林不
負閒落木滿空秋萬里暝禽遙帶夕陽還

靜隱

掃地焚香習燕清蕭然一室謝將迎坐移白日光間
影睡起春禽竹外聲心遠自應人境寂道深殊覺世

緣輕問竒尚有門前客却恨青山不捨名

閒居漫興

深巷無人晝掩扉新晴庭院綠陰肥柳風吹絮河鮓
上花雨沾泥海燕飛殘睡未能消卯酒乍暄聊復試
春衣東風綠遍江南草多少王孫怨不歸

夏日睡起

綠陰如水夏堂涼翠簟含風午夢長老去自於閒有
得困來時與客相忘松牕試筆端溪滑石鼎烹雲顧
渚香一鳥不鳴心境寂此身真不媿羲皇

聞蛙

青燈背壁夜微茫閣閣羣蛙正繞堂細雨黃昏貧鼓
吹誰家青草舊池塘年來水旱真難卜我已公私付

兩忘寄語繁聲休強聒吳城明日是端陽

聞雞

乍鳴滄海日東昇再唱長安萬戶醒風雨何曾迷曉
漏霜天還解散踈星誰憐半夜燈前舞常自衝寒馬
上聽此日山牕呼不起壯心回首摠凋零

顧華玉邀予爲西湖之遊病不能赴詩以謝之
舊約錢塘二十年春風擬放越溪船却憐白髮牽衰
病應是青山欠此緣漫說西湖天下勝負他北道主
人賢只餘好夢隨潮去月落空江萬樹煙

上巳日石湖小集

楞伽湖上晚風和茶磨巖前宿雨過士女競浮青雀
舫野人自占白鷗波春來花鳥閒情在老去山林樂

事多辦取一樽酬令節扣舷聊和竹枝歌

湛甘泉司馬以詩招遊衡山奉答

家世衡陽有釣臺江湖流浪未能回政懷桑梓千年
計忽枉封題萬里來月滿羅浮勞我夢雲埋嶽麓待
公開追攀見說襟懷壯儻許春風杖屨陪

二月念六日遊天池諸山

西北羣山列翠屏天池宛轉帶支硎行穿壑谷身忘
倦忽聽松風酒又醒歲閏故應春緩緩民饑欣見麥
青青老年行樂知無幾莫負樽前雙玉瓶

憶昔四首次陳魯南韻

三年端笏侍明光潦倒爭看白髮郎咫尺常依天北
極分香曾直

殿東廊紫泥浥露封題濕寶墨含風賜扇香記得退
朝歸院靜微吟行過藥闌傍

其二

紫殿東頭敞北扉史臣都着上方衣每懸玉佩聽雞
入曾帶宮花走馬歸此日香鑪違伏枕空吟高閣靄
餘輝三年歸臥滄江上猶記雙龍傍 輦飛

其三

扇開青雉兩相宜玉斧分行虎旅隨紫氣氤氳浮象
魏彤光縹緲上杲恩幸依日月瞻

龍袞偶際風雲集鳳池零落江湖儔侶散白頭心事
許誰知

其四

一命金華忝制臣山姿偃蹇漫垂紳媿無忠孝酬千
載曾履憂危事

一人陛擁春雲嚴虎衛殿開初日照 龍鱗白頭萬
事隨煙滅惟有觚稜入夢頻

荆溪道中

荆溪西下小船通離墨銅棺在眼中坐詠風煙懷杜
牧曾穿巖竇識張公遠山如畫雲開嶂落日供詩翠
滿蓬賸欲躋攀老無力空餘雙目送飛鴻

人日喜晴有懷故友王履吉

良辰樂事不相違一咲褰簾喜上眉浮弄新晴初日
色破除殘臘早梅枝山林爛熳青樽在老病侵尋白
髮知不見故人春滿眼臨風空賦草堂詩

江陰道中賦贈王祿之

春水浮煙柳映空
蘭舟西下兩人同
等閑機事楸枰外
只尺江山畫笥中
一笑頭顱忘我老
百年家世與君通
不眠共理平生語
落盡燈花月滿蓬

湯子重赴南雍

望望金陵路不遙
故人西上木蘭橈
春風貰酒丹陽郭
明月題詩白下橋
壯志君方事行役
暮年吾每戀親交
江城雪後梅花盡
無限殷勤在柳條

顧榮夫園池

臨頓東來十畝莊
門無車馬有垂楊
風流吾愛陶元亮
水竹人推顧辟疆
早歲論交常接席
暮年投社忝同鄉
寄言莫把山扉掩
時擬看花到草堂

榮夫見和再疊

爲愛高人水竹莊
幾回繫馬屋邊楊
每開蔣徑延求仲
常伴山公有葛疆
陋巷誰云無轍迹
城居曾不異江鄉
春來見說多幽致
開徧梅花月滿堂

春日雨中

彤閣煙輕翠陸離
曉簾風急雨絲絲
情淹宿酒春愁重
坐弄殘棋晝景遲
野色送青山半出
煖痕回綠草先知
老來自覺才情減
開盡梅花未有詩

人日期與孔周子
重小集以事愆期
獨坐有懷草痕簾
影碧參差此日逢
人有所思樊圃又
看桃李始江梅剛
是試花時喜無冰
雪春寒淺況值清
明淑景遲有約不
來成寂寞臨風再
詠草堂詩

穀日孔周子重祿之南樓小集

靈莢初開第八萸玉梅新試兩三英要知春早花期
近喜卜年豐穀旦晴綠醕不教虛節叙白頭聊復話
平生相攜莫便匆匆去新月南樓正自明

伍疇中太守惠酒將過訪

玉川有約到吾廬先遣長鬚致鯉魚老我草玄方寂
寞故人乘興定何如山園夜雨剪春韭花徑春風候
小車青眼交遊無幾在白頭光景莫教虛

齋居漫興

香消古鼎靜沉沉寂寞城居似遠林日上樓臺朝氣
爽燕飛簾幕夏堂深踈花淨掃風前迹碧樹新添雨
後陰老覓知音殊意懶任教塵暗壁間琴

春寒病起

十日春陰一日晴春衫猶怯曉寒輕蕭條病骨梅花
瘦宛轉閒愁蔓草生閉戶新波平野岸倚樓山色繞
江城東風早晚持樽酒去聽橫塘滿樹鶯

夏雨

六月飛塵撲面黃蕭然一雨破驕陽長風鼓浪翻茅
屋宿霧排雲壓短墻秋事已占南畝喜午眠仍飽北
牕涼登樓別啓西牕看橫卷湘簾一片蒼

袁與之送新茶薦以榮夫新笋賦謝二君

揀芽駢笋薦新泉石鼎沙鐺手自煎一咲月團欣見
面百年玉板更參禪錦舒風籜春雷後翠展雲旗穀
雨前珍重故人披賦意盡驅塵俗破昏眠

秋夜

宿酒微消睡思濃孤懷兀兀夜溶溶半牕涼影雙桐
月一榻秋聲四壁蟲坐閱歲時成老大天教貧病養
踈慵曾叅際會無裨補羞更從人說臥龍

九日招孔周諸君

芙蓉波冷桂風涼晤語蕭疎白髮長青眼平生幾親
舊黃花荏苒又重陽越樽久湛金華露吳蟹初肥笠
澤霜擬合羣賢酬一醉呼兒爲掃玉蘭堂

宗伯招湯子重遊虎丘

入門連嶺翠峻嶒別徑穿雲次第登碧瓦參差蓬宇
靜古簾依約紫厓崩眼中歷歷悲前劫方外悠悠媿
老僧十載同遊半零落長明惟有佛前燈

湯右卿寄十月菊

奕奕秋光照眼新扁舟來自楚江濱多君珍重黃金
贈老我衰遲白髮新應是晚香同臭味故教寒艷發
清真誰言已落重陽後十月江南正小春

再遊虎丘

短簿祠前樹鬱蟠生公臺下石巉顏千年精氣池中
劍一壑風煙寺裏山井冽羽泉茶可試草荒支澗鶴
空還不知清遠詩何處翠蝕苔花細雨班

三月晦徐少宰同遊虎丘

海湧峰頭宿霧開王珣祠畔少風埃林花落盡春猶
在巖壑無窮客又來水齧滄池消劍氣雲封白石濩
經臺一樽不負探幽興更試三泉覆茗杯

同南充王子正登崑山臥雲閣

時爲尹

春雨初晴白玉峰春風冠蓋一樽同使君不負青山
約高會還參白髮翁煙領夕陽飛鳥背天圍平野曲
欄東怪來日暮衣裳冷身在臥雲高閣中

春歸

三月春光積漸微不須風雨也應歸與人又作經年
別回首空驚昨夢非江燕引雛芳草滿林鶯出谷杏
花稀沈郎別有傷情地不爲題詩減帶圍

詠白燕

高下翩翩雪羽齊江南社後絮飛時夢回王謝烏衣
盡舞罷昭陽縞袖垂簾外風輕銀剪剪釵頭春冷玉
差差畫樓霜月傷心處只許張家盼盼知

五月

五月雨晴梅子肥杏花吹盡燕飛飛晴光已到青團
扇士女新裁白苧衣黃鳥故能供寂寞綠陰何必減
芳菲子雲自得幽居樂不恨門前轍跡稀

五月望日登望湖亭

是日微雨作風

木末虛亭瞰碧瀾倒飛天影入憑闌嵐光浮動千峰
濕雨氣薰蒸五月寒石磴躡雲芒屨短松風吹雨苧
袍寬狂吟莫怪遲歸去白髮還能幾度看

秋夜

四壁鳴蟲露下餘片雲收雨酒醒初風掠墜葉秋聲
早月印空庭夜色虛衰病不禁時叙改蕭閑自與世
情疎若爲白首安眠地時有驚塵報羽書

丁未九日與履約諸君同汎石湖就登上方
宿雨初晴水拍天碧雲微歛日華鮮時當黃菊茱萸
候秋在滄洲白鳥邊柳外畫橋人似蟻湖心蘭棹酒
如泉攜壺更醉湖山上白髮重逢又一年

汎湖

春盡南湖碧玉流故人湖上共夷猶平撓野渡沿青
草疊鼓中川起白鷗雲日霏霏梅子雨風蒲獵獵藕
花洲行春橋外山千疊盡逐波光上綵舟

是歲閏九月再汎

剛喜重陽臨閏月不辭老病復登臺多情秋色依前
在有待籬花故晚開佳節從知難再值青山端不厭
重來畫船記取橫塘路十里笙歌載月回

新夏

暖風庭院草生香晴日簾櫳燕子忙白髮不嫌春事
去綠陰自喜夏堂涼閒心對酒從時換老倦拋書覺
晝長客有相過同一笑竹鑪吹火試旗鎗

聞砧

明滅踈燈鑿薄帷誰家擣練夜遲遲驚回短夢千門
月不斷秋風萬里思歲晚江城還自急天寒閨閣最
先知高樓人靜星河爛正是霜華欲下時

自華亭還吳夜泊磧磯

放棹華亭指故園九峰晴色接吳門秋風沽酒唐行
市斜日維舟磧磯村墟落風煙沙渚口人家燈火竹
籬根機雲踪跡今何處一望岑山一斷魂

袁魯仲邀登列岫樓

故人湖上有高樓十載清罇續舊遊飛翠牕中仍列
岫片帆天際見歸舟依然綠樹啼黃鳥無賴青山笑
白頭不盡阿戎淹戀意渚雲江草兩悠悠

是晚過行春橋翫月再賦

行春橋上月娟娟杜若洲西宿畫船萬鏡不波天在
水四山沉影夜如年已知世事皆身外肯着閒愁到
酒邊宛轉清歌出林表晚煙依約正蒼然

玄暮道中

輕陰駁日水含沙二月江南好物華早辦行輿衝細
雨不教山屐負梅花煙林滴翠千峰濕石磴穿雲一
徑斜風泊晚煙寒不散磬聲遙識梵王家

雨後虎山橋曉望

虎山橋下水交流正是橋南宿雨收光福煙開孤刹
迥洞庭波動兩峰浮已應浩蕩開胸臆誰識空濛是
勝遊渺渺長風天萬里眼中殊覺欠扁舟

夏日

永夏茅堂風日嘉涼陰寂歷樹交加客來解帶圍新
竹燕起衝簷落晚花領畧清言蒼玉塵破除沉困紫
團茶六街車馬塵如海不到柴桑處士家

新秋

秋風昨已到山塘坐愛閒庭過雨涼月榭誰家悲玉
笛露桐虛井滴銀牀病侵肌骨驚寒早年入衰遲覺
夜長氣候無憑殘暑在手中紈扇未能忘

八月十四夜對月有懷

月近中秋夜有暉幽人戀月臥遲遲及時光景寧須
滿明日陰晴不可期清影一簾金瑣碎涼聲何處玉
參差酒闌無限懷人意都在庭前桂樹枝

十五日

銀漢無聲夜正中十分秋色小樓東空瞻朗月思玄
度誰有高懷似庾公把酒金波浮桂樹捲簾清露滴
梧桐碧雲何處人如玉惆悵東闌一笛風

十六夜

入眼冰輪積漸摧白頭顧影重徘徊極知物理盈當
缺自惜流年去不來蟋蟀早將寒氣至芙蓉都受露
華開殷勤不負花前醉依舊清光在酒杯

小至夜

雲物熙微度曉光閉關聊復謝迎將陰陽自與時消
息身世都歸日短長潦倒已無朝省夢氤氳空憶
殿鑪香向來心事葭灰冷贏得蕭蕭兩鬢霜

送彭赴嘉興訓導二首

清時一命忝師儒百里鄰州接里閭志養于今欣有
祿官貧莫歎食無魚微名聊足酬初志多暇何妨讀
舊書九十老人須在念頻頻書札問興居

其二

東望嘉禾近百程漫隨儒牒去親庭蟬聯宦業承三
世辛苦傳家有一經我老自憐衰鬢白汝行不失舊
氈青還應別後鍾情處飛夢時時秀水亭

戊午元旦

黃鳥風簷遍好音
白頭牕下整冠巾
喜聞海上烽煙息
又見人間日月新
霽景騰輝金勝曉
暖痕飛雪玉梅春
何當載酒尋芳去
綠滿郊原草似茵

肇孫北行

阿翁九十苦鍾情
倚杖那堪送汝行
壁水去遊天子學
春風須聽上林鶯
壯途初發千山軻
雅志無忘萬里程
三百年來忠孝在
慎言無潰舊家聲


巳未元旦

勞生九十漫隨緣
老病支離幸自全
百歲幾人登耄耄
一身五世見曾玄
祗將去日占來日
誰謂增年是減年
次第梅花春滿目
可容愁到酒樽前

文太史詩

文淵閣





固